

Projek Hidroelektrik Nenggiri, kerajaan buat 30 sesi libat urus bersama Orang Asli

Oleh Samadi Ahmad - Jun 14, 2022 @ 1:39pm
bhnews@bh.com.my



Takiyuddin (dua dari kiri) pada sidang media Permohonan Bidaan Bagi Kuota Baharu FIT 187 Megawatt (MW) untuk sumber biogas, hidrokuasa kecil dan biojisim Semenanjung Malaysia hari ini. NSTP/Samadi Ahmad.

PUTRAJAYA: Kerajaan mengadakan lebih 30 sesi libat urus bersama masyarakat Orang Asli dan penduduk setempat bagi melaksanakan Projek Hidroelektrik Nenggiri.

Menteri Tenaga dan Sumber Asli (KeTSA), Datuk Seri Takiyuddin Hassan, berkata sesi libat urus itu juga dilaksanakan Suruhanjaya Hak Asasi Manusia Malaysia (SUHAKAM) yang disertai pemimpin komuniti Orang Asli dari Pos Tohoi, Pos Pulat dan Kampung Kuala Wias serta kumpulan Jaringan Kampung Orang Asli Kelantan (JKOAK) di tapak projek empangan hidro itu.

Susulan itu, beliau berkata, dakwaan kononnya kerajaan meminggirkan wakil Orang Asli ketika pelaksanaan Projek Hidroelektrik Nenggiri adalah tidak benar.

Katanya, Kajian Penerimaan Awam oleh pakar perunding, UKM Pakarunding Sdn Bhd pada 2018 menunjukkan tahap penerimaan projek oleh penduduk di ketiga-tiga perkampungan meningkat kepada 80 peratus berbanding 69.5 peratus pada 2015.

"Tenaga Nasional Bhd (TNB) bersama Kerajaan Kelantan dan jabatan serta agensi berkaitan juga akan melakukan penempatan semula Orang Asli yang terkesan berdasarkan keperluan perundangan dan persetujuan penduduk terbabit.

"Jadi, kerajaan menafikan projek ini meminggirkan wakil Orang Asli di peringkat pelaksanaan, malah bantahan serahan memorandum kepada Perdana Menteri, Datuk Seri Ismail Sabri Yaakob yang diadakan minggu lalu hanya membabitkan sebilangan kecil Orang Asli yang tidak bersetuju dan disertai masyarakat Orang Asli dari kawasan luar projek itu," katanya pada sidang media Permohonan Bidaan Bagi Kuota Baharu Tarif Galakan (FIT) 187 Megawatt (MW) untuk sumber biogas, hidrokuasa kecil dan biojisim Semenanjung Malaysia di sini, hari ini.

Kenyataan Takiyuddin ini merujuk kepada bantahan sekumpulan Orang Asli diketuai Pengerusi JKOAK, Mustafa Along yang menyerahkan memorandum kepada Perdana Menteri pada Selasa lalu mendakwa pembinaan empangan hidroelektrik itu dijangka menenggelamkan kawasan hutan seluas 5,384 hektar yang juga tanah adat dan wilayah Orang Asli di Gua Musang, Kelantan.

Beliau berkata, penduduk terbabit dalam projek empangan ini akan ditempatkan di penempatan baharu yang lebih selesa dan dilengkapi kemudahan awam, selain pendapatan lebih terjamin menerusi perusahaan kebun getah yang bakal dibangunkan.

Katanya, perunding arkeologi juga dilantik bagi pengurusan 13 tapak prasejarah yang dikenal pasti, khususnya gua batu kapur bagi pelaksanaan kerja arkeologi atau carigali artifak secara besar- besaran.

"Projek ini membuktikan komitmen kerajaan dalam merealisasikan Aspirasi Nasional iaitu mengurangkan kebergantungan terhadap arang batu sebagai sumber penjanaan elektrik dengan menetapkan sasaran 31 peratus kapasiti Tenaga Boleh Baharu (TBB) dalam pembekalan elektrik negara menjelang 2025 dan 40 peratus menjelang tahun 2040," katanya.

Sementara itu, mengulas program hari ini, beliau berkata, projek Kuota FiT ini merangkumi 30MW dikhaskan bagi sumber biogas, 127MW bagi sumber hidrokuasa kecil dan 30MW bagi sumber biojisim.

Semua kuota ini boleh dimohon secara bidaan dalam talian (e-bidding) melalui laman sesawang SEDA Malaysia, bermula 2 Ogos ini untuk hidrokuasa kecil serta 9 Ogos untuk biogasdan biojisim.

Permohonan kuota FiT secara e-bidding mula dilaksanakan pada 2018 bagi sumber biogas sebelum diperluaskan bagi sumber hidrokuasa kecil pada 2019 dan sumber biojisim pada 2021 .